

## SALTER DAVIES, ERNEST (1872 - 1955), addysgydd

**Enw:** Ernest Salter Davies  
**Dyddiad geni:** 1872  
**Dyddiad marw:** 1955  
**Priod:** Evelyn May Salter Davies (née Lile)  
**Rhiant:** Emma Rebecca Davies  
**Rhiant:** Thomas Davies  
**Rhyw:** Gwryw  
**Galwedigaeth:** addysgydd  
**Maes gweithgaredd:** Addysg  
**Awdur:** Mary Auronwy James

Ganwyd 25 Hydref 1872 yn fab i Thomas Davies, gweinidog (B) a llywydd Coleg y Bedyddwyr, a'i wraig Emma Rebecca, Hwlfordd, Penfro. Mynychodd ysgol ramadeg Hwlfordd, a Coleg Prifysgol Cymru, Aberystwyth, a chael ysgoloriaeth yn y clasuron i Goleg Iesu, Rhydychen. Am gyfnod maith bu'n drefnydd ac arweinydd blaenllaw ym myd addysg yn Lloegr. Cychwynnodd ar ei yrfa fel athro yn Academi Glasgow, 1895-96, ac wedyn bu yn ysgol ramadeg Cheltenham nes cael ei benodi'n arolygwr addysg uwch yn swydd Caint yn 1904 a'i ddyrchafu'n gyfarwyddwr addysg y sir honno yn 1918, swydd a lanwodd gydag anrhydedd hyd nes iddo ymddeol yn 1938. At hyn, bu'n gynghorydd addysg i'r fyddin yn 1918 a charchar Maidstone o 1923 hyd 1938 ac etholwyd ef yn llywydd nifer o gymdeithasau addysg a llyfrgelloedd. Cydnabuwyd ei wasanaeth trwy ei wneud yn C.B.E. yn 1932 a derbyniodd M.A. er anrhydedd gan Brifysgol Adelaide yn 1937.

Hyd yn oed wedi iddo ymddeol yn swyddogol parhaodd i fod yn weithgar a dylanwadol ym myd addysg. Gwasanaethodd fel aelod o'r pwyllgor ar Addysg Amaethyddol Uwch i'r Weinyddiaeth Amaeth yn 1940 ac ar Gyngor Canolog Darlledu i Ysgolion hyd 1948, gan fod yn gadeirydd ei Bwyllgor Ysgolion Gwledig. Bu'n gadeirydd llawer o gyrff eraill gan gynnwys Ymddiriedolaeth Carnegie yn y Deyrnas Unedig (1946-51), y bu'n ymddiriedolwr oes iddi er 1924.

Ymhlith ei gyhoeddiadau ceir *The Aim of Education* (National Adult School Union); *The Reorganisation of Education in England* (New Education Fellowship); *Education for Industry and for Life*; *Technical Education* (The Schools of England), a golygodd *Kenilworth* a *The Fortunes of Nigel* gan Scott ar gyfer ysgolion. Fel golygydd y *Journal of Education*, cynhaliodd enw da'r papur hwnnw o 1939 hyd o fewn ychydig fisoedd i'w farwolaeth yn 83 mlwydd oed.

Priododd, 1900, Evelyn May Lile (marw 1951) o Ddinbych-y-pysgod a bu iddynt ddau fab. Bu farw 10 Mehefin 1955 yn ei gartref yn 13 Chichester Road, East Croydon, Surrey.

### Awdur

Dr Mary Auronwy James

### Ffynonellau

*Who was who?*

*The Times*, 11 Mehefin 1955, 10f

### Dolenni Ychwanegol

VIAF: [94656199](#)

Wikidata: [Q5393781](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

